

2 SAMOIRI

Ipegakara Iravi igoveenkariegite iseraereegi

5 ¹Impogini maganiro itinkamiegi iyashikigeiganakerira iseraere iaigake Everonku ikantaigakerira Iravi: —Naroegi nantiegi pitovaireegi. ²Antari aiñokyara itimaveta nogoveenkariegite Saoro vironiroro tentapiniigana nomana-taigara. Aikiro ikantakempi Tasorintsi: ‘Maika viro sentaigaerine noiseraereegite pimpegakempara igoveenkariegite.’

³Impo inekera onti ipokashiigake inkantaigakerira ikogaigakera impegakagaigakerira igoveenkariegite ovashi ikantake:

—Iroroventi kametitake.

Impo ikemavakagaigakara ikantaigairi Iravi:

—Maikari maika ontsatagakenkanityo magatiro akantaigakerira, ikemaigakaitari Tasorintsi.

Impo iriroegi isaguigakeri aseite igitoku ipegakagaigakarira igoveenkariegite.

Iravi yagapitsaigakerira jevoseoegi Shion

⁶Impogini yogari koveenkari Iravi itentaiganakari isoraroegite iaigakera Jerosarenku yomanataigakarira jevoseoegi timaigankitsirira kara.

Iriroegi ikantaigavakeri: “Garatyo pagaveimaigana pairaigamatakevitar, kañotari irirora pomanaigempa terira iranuitagantsiige intirika terira ineaige iragaveaigakempityo.”

Antari ikantaigakera maika ontitari ineaigakera yovetsikakoigakara itantatsaitakoigakara neroty ineaigiri gara yagaveaigiri, ⁷kantankicha irirori yagaveaigakerityo yagapitsaigakerira Jerosaren paitacharira aikiro Shion. ¹⁰Impogini ariompaty yagaveasanova-getanakeri, kantakanitari itentakarira Tasorintsi gaveavagetatsirira.

Ikantakeririra Tasorintsi Iravi

7 ¹Impogini tenige iriatapinitae Iravi iromanatapinitaempara onti itimagantsivagetake ivankoku, irirotari mutakotakeri Tasorintsi yagaveaigakerira kisaigakeririra. ²Impo ikantiri kamantantatsirira Natan:

—Narori onti notimake pankotsiku santaviripanko kameti novetsikavankoa-kotaka nonegintetakotaka, kantankicha ogari igajonakite Tasorintsi onti onanta-vagetaka kamisapanko.

³Yogari Natan ikantiri:

—Nani vetsikeroty magatiro pisurege-takarira, itentakempitari Tasorintsi.

⁴Impo tsitenigetiku iniakeri Tasorintsi Natan ikantiri: ⁵“Piatakera pinkantakerira nomperane Iravi: ‘Ikantake Tasorintsi: ¿Tyara onkantakempara povetsikakenara novanko nontimantakempara?’,

⁶teranika nontimantumatemparonika pankotsi okyara nagaigaatirira yashikiiganakempirira Ejipitoku kigonkero maika. Intagatityo notimantaka kamisapanko.

⁷Kañotari karanki notentaigakarira

iseraereegi anta osarigagitetapaakera
 ħmatsi ario nokantaigakeri itinkamiegi
 nokogakagaigakerira irisentaigakerira
 nokanti: Povetsikumaigenatyo pankotsi
 novetsikavankoakotakempara?’

⁸“Pinkantakerira aikiro: ‘Ikantake
 Tasorintsi shintagitearorira magatiro
 ikanti: Antari pairani aĩňokyara pisentave-
 tari povishate teratyo pimpaitumatempa,
 kantankicha naro nokogakagakempi
 pimpegakempara igoveenkariegi
 noiseraereegite. ⁹Impo tyarika pinake
 notentakempityo nopugamentakempi
 nopogereagakerira kisaigakempirira.
 Maika nagaveakagavagetakempityo kara
 pampagiteakovagetanakempatyo inkema-
 koitakempira pinkaňoigakemparira
 pairorira yavisaigake yagaveavageigira
 ikemakoigaganira. ¹⁰Aikiro nopaigakeri
 noiseraereegite igipatsiegi kameti
 inkantanira intimagantsivageigake
 ganiri yoveraimaigiri terira inkematsai-
 gena ¹¹inkaňotagaigaerira karanki intira
 timaigankitsi ijoseegite, aikiro viro
 garatyo yoverajaigaimpi kisaigakempirira.

“Imirinkaegityo pegaigankichane
 koveenkari piyashikiiganakerira.

¹²Antari pinkamanaera, irirokya
 nompegakagaempa koveenkari pitomi
 garatyo tyani gaveimatatsi iokakerira.

¹³Iriro vetsikakenane novanko, impo
 kantakanityo impegagakempara koveen-
 kari iyashikiiganakerira. ¹⁴Irirori
 impegakena iriri, narokya pegakerine
 notomi. Garika ikematsatana nonkisakeri
 nontigankimotakeri pashini iripokashii-
 gakerira iromanataigakemparira
 iragaveaigakerira, ¹⁵kantankicha
 nonkantakanityo nontsarogakagkem-
 pari gara nokaňotagari Saoro tenigera
 nontsarogakagempari onti nokisashita-
 kari kameti pimpugakerira. ¹⁶Arisanotyo
 nokantasanotakempi inkantanityo
 impegakempa koveenkari piyashikitana-
 kerira.”

¹⁷Impo yogari Natan iatake ikamanta-
 getakerira koveenkari Iravi magatiro
 ikantagetakeririra Tasorintsi.

Iravi ontiri Vetsave

11 ¹Impogini aganaara iatapiniigira
 koveenkariegi yomanataigara
 yogari Iravi tera iriate onti inai
 Jerosarenku. Inti itigankake Joave intiegiri
 inampinaegi intiegiri aikiro maganiro
 manataigacharira. Onti itigankaviigakeri
 impogereagakerira amonitaegi impo
 yonkuatakoigakari Iravaaku yomanataiga-
 karira. ²Impogini okutagitegetanakera
 inanaira shavini yogari Iravi itinaanaka
 yagatsonkutanakera otishitapanokoku
 ivanko yanuiavetakera ineventagitevage-
 takara. Impo ineventakotakaro paniro
 tsinane kaavagetake onkametivageteratyo
 kara. ³Irirori ikantaigakeri iromperaneegi
 iriaigakera inkogakotagantaigakerora
 tyanirikara shintotaro irishinto. Iriroegi
 iaigake ikogakotagantaigakerora impo
 ipigaigaa ikamantaigapaakeri ikanti:

—Onti Vetsave irishinto Eriame. Inti
 shintaro itita paitacharira Oriashi.

⁴Impo irirori yagakagantakero
 opokakera ivankoku ineakerora. Onti
 okyaenka kivaacha opirinitira. Impo
 oatai ovankoku, ⁵ovashi itimake
 otyomiani. Irorori okamantakagantakeri
 Iravi okanti: “Timake notyomiani.”

⁶Irirori ikantakagantakeri Joave intigan-
 kakenerira Oriashi impo irirori itiganka-
 keneri. ⁷Antari ipokakera ikogakotagan-
 tavakeri kametikyari inake Joave
 intiegiri maganiro manataigankicharira.
 Ikogakotagantakeri aikiro tyani gavean-
 taiganankitsi. ⁸Impo ikantakeri iriatakera
 ivankoku irapishigopireapaakempara.

Antari ikontetanakera yamakagantake-
 neri ivatsa irogakemparira paita
 ivankoku, ⁹kantankicha yogari Oriashi
 teratyo iriate ivankoku onti imagake
 sotsimoroku tsompogi otantatsaitakotara

ivanko Iravi itentaigakarira isoraroegite sentaigirorira ivanko. ¹⁰Impo ikaman-tunkani Iravi ikantunkani:

—Yogari Oriashi tera iriate ivankoku.

Irirori ikaemakagantakeri ikantiri:

—¿Matsi tyara pikantaka viro?, vikyatari pokavetaacha piponiaara parikoti ¿tyara okantakara tera piatapae pivankoku pinkamosotapaerora pitsinanetsite?

¹¹Irirori ikantiri:

—Nogoveenkarite, garatyo nokañotu-matiro maika. Kañotari igajonakite Tasorintsi onti onantaka kamisapanko ario nantiri atankitsine novankoku nosekatava-getakempara, aikiro nonkorivagetaerora notsinanetsite. Ariotari ikañoigaka aikiro Joave intiegiri pinampinaegi intiegiri aikiro maganiro iseraereegi manataiganki-charira onti imagaigake anta kogapage, intagatityo imagantaigaka kamisapanko.

¹²Impo ikantiri:

—Irovento maika gatata pipiganaa, panivati pimage, kamani ario nontigan-kaempi.

Ovashi tera iriate. ¹³Impo yogari Iravi ikaemakeri isekatagakarira impo yogitakeri yogashinkiakerira, kantanki-cha ochapinitanaira teratyto iriate ivankoku. Ontityo iatai imagakera imagapaira okyara itentaigaarira isoraroegite Iravi. ¹⁴Impo okutagitetana-kera yogari Iravi itsirinkavakeneri sankevanti Joave ipavakerira Oriashi iramanakerora. ¹⁵Antari itsirinkakenerira onti ikantiri: “Maika nokogake pintigan-kakerira Oriashi iriatakera iromanata-kempara inasanoigakera suraritananoi-gankitsirira impo pishigapitsaiganakerira kameti irogakenkaniniri.” ¹⁶⁻¹⁷Impo yogari Joave ario ikañotakero. Itiganka-keri Oriashi iriatakera iromanataigakem-parira suraritananoi-gankitsirira nerotyto ipokashiigakerira yomanataigavakarira yogagarantaigakeri inampinaegi Iravi ovashi imatunkani aikiro Oriashi irirori.

²⁶Impogini okemakotakerira itsinanetsite okenkisureakotakari. ²⁷Impo otovaigagi-tetanaira yagakagantakero Iravi yagake-rora impo omechotake inti itomi. Kantankicha antari ikañotakerora maika yogari Tasorintsi ikisavitakerityo, teranika inkoge inkañoterora maika.

Natan ikanomaakerira Iravi

12 ¹Impogini yogari Tasorintsi itigankakeri Natan iriatakera inakera Iravi, impo irirori iatake ikantiri:

—Año piteni surari timaigatsirira parikoti pashiniku apatogetara pankotsi. Paniro inti shintavagetacharira, yogari irapitene teratyto tatakona irashintuma-tempa. ²Yogari shintavagetacharira itovaigavagetityo irovishate intiri ivakane. ³Yogari terira irashintavagetempa panirosanotyto yashintaka paniro otyomiani ovisha tsinane ipunatakera okyara otyomiakyanira. Impo tsikyata irirori yogimonkakero itentagantaigaka-rora itomiegi ineirora. Ineasanovagetirotyo kara tatarika yogaigaka ipakero irorori, aikiro yogitantaroyoviikantarira yogima-giro iro roku. Itasanovagetakarotyto kara ikañotagasanotakaro irishinto. ⁴Impogini ipokake pashini ineerira shintavagetacharira. Impo irirori teratyto inkoge iragakera paniro irovishate intirika ivakane ironkota-kagantakenerira isekatakempara, ontityo yagutakeri irovishate terira irashintavagetempa yonkotakagantakenerira.

⁵Yogari Iravi ikisamatanakatyto ikantiri Natan:

—iKantetyo inkamakera kañotakero-rira maika! ⁶Aikiro impunataerityo yogamagutakerira irovishate impaerira pashini 4, arioankiniri ikañotakerora maika tera intsarogakagempari.

⁷Yogari Natan ikantutarityo Iravi:

—Viotari kañotakero maika.

Ikantakempitari Tasorintsi shintaigaririra iseraere: ‘Naro nokogakagakempi

pimpegakempara igoveenkariegite iseraereegi impo nopugamentakempi tera irogempi Saoro. ⁸Nopakempiro ivanko ontiri aikiro itsinaneegite nopegakagakempira igoveenkariegite maganiro iyashikiiganakerira Iseraere, iriroegitari iyashikiiganakerira Jora intiegiri iyashikiiganakerira maganiro irirentiegi. Antari ontimakeme pashini pinkogakotakemparira nopakempirometyo. ⁹¿Antari gara pikañotiro maika tera pisuretumataemparo nokantakempirira pintsatagakerora?, ontityo povetsikake terira nonkogero naro, pogakagantakeriniroro Oriashi pagutakerira itsinanetsite. Irironiroro gaigakeri amonitaegi, kantankicha viro kantankitsi irogakenkanira. ¹⁰Maikari maika kantakatyo onkañotakempara maika irogaigakenkanira piitaneegi kigonkero piyashikivagetanakerira, pisamatsanatakenatari pagutakerira Oriashi itsinanetsite.’

¹¹“Aikiro ikantake Tasorintsi: ‘Ganige ipinkatsaigaimpi piitaneegi, aikiro nagapitsaigaempiro pitsinane-tsita nompagakerira pitovaireegi iragaigakerora ineaigakerira maganiro. ¹²Virori onti pomanakotakero povetsikakerira, kantankicha naro ontityo nogikoneatakero nantsipereakagakempira.’”

¹³Impo yogari Iravi ikantiri Natan: —Arisanoniroro novetsikake terira onkametite tera nonkematsateri Tasorintsi.

Ikanti irirori:

—Yogari Tasorintsi irogavisaakotakempi maika ganiri pikami, ¹⁴kantankicha yogari pitomi omechotakerira Vetsave iriro pinkante kamankitsine, ineaigakempitari terira inkematsaigeri Tasorintsi povetsikakerira ovashi iniashinaiganakari Tasorintsi itsoenka-naigakerira.

¹⁵Impo yogari Natan iatai ivankoku.

Impogini yogari Iravi iniakeri Tasorintsi ikamantakerira magatiro yovetsikakerira ikantakerira irisaankarira ikañovagetakara.

Impo yogari Tasorintsi yogimantsigaitakeri itomi Iravi itomintagakarorira Vetsave imantsigavagetanaketyo kara tenigeenka. ¹⁶Impo iniaventakeri Iravi ikantakerira Tasorintsi irovegerira. Teratyo isekataempa, aikiro teratyo iriathe imagira, ontityo iatake inoriasetakara kipatsiseku. ¹⁷Impo iaigavetakatyo itinkamiegi iseraereegi timavankoagiririra irogitinajaigerimera, kantankicha irirori teratyo inkoge, aikiro teratyo inkoge isekatakempara intentaigakemparira.

¹⁸Impo aganakara 7 kutagiteri ikamanake itomi. Yogaegiri inampinaegi teratyo inkogaige inkamantaigakerira, ikantaigaketari: “Kañotari aïñokyara yanii akyari tyampa ankantaigakeri aniaigakerira ariomparorokari maika ankantaigakerira kamake pairorokari irogaganakempa inkenkisureasanotanakempara.”

¹⁹Kantankicha irirori ineaigakerira iniavakagaigakara yogotake kamake, ovashi ikantaigakeri:

—¿Yogaa, mataka kamake?

Iriroegi ikantaigi:

—Jeeje, mataka kamake.

²⁰Impo irirori ogatyo ikenake ikitareanaara ikaatakera isagutakara kasankaari yogagutanaara pashini imanchaki iatakera ivankoku Tasorintsi itigeroaventakarira iniakerira ikantakerira: “Omirinka katinka pogagetakero magatiro.” Impo ipigaa ivankoku inevitake iseka isekatakara.

²¹Yogaegiri inampinaegi ikantaigiri:

—¿Tyaratyo pikantakara viro? Antari aïñokyara yanii pitomi tyarika, teratyo pisekataempa onti piragaka. Maikari ikamakera pitinaamatanakatyo pisekatakara.

²²Irirori ikanti:

—Ontitari nokanti impa ariorakari nonkañotakero maika gara nosekataa onti niragakempa ineakenara Tasorintsi ariorika intsarogakagakena ovashi irovegaeri notomi. ²³Maikari maika matakatar kamake nompiriniveta-kempa kogapage gara nosekata ario tyara nonkantaeri. ¿Matsi ario

nagaveake noganiaerira? Narori nonkamanae impogini noatae iriroku noneaeri, kantankicha irirori garatyo yagaveimati iripokaera aka naroku.

²⁴Impo irirori yogishineairo Vetsave. Impogini itomintagaaro pashini ipaitakeri Saromon, iriro pinkante itakari Tasorintsi.